

[< Go back to Article Page](#)[Print Article](#)

Perguruan silat jual sate goreng bagi kumpul dana \$45,000

BERITA HARIAN, 5 February 2003, Page 10

Perguruan silat jual sate goreng bagi kumpul dana \$45,000

A PA kaitannya sate dengan seni silat? Banyak.

Terutama apabila menyentuh soal kreativiti dalam mengembangkan dunia seni pencak silat yang semakin kurang mendapat perhatian di Singapura.

Menerusi penjualan sate itulah sebuah perguruan muda di Singapura, Keluarga Besar Pewaris Budaya Pusaka Karuhun, ingin mengumpul dana sebanyak \$45,000 bagi mengembangkan aspek seni tradisional pencak silat di sini — sesuatu yang kurang diberi perhatian sejak olahraga menjadi tumpuan dalam pertandingan-pertandingan di peringkat nasional dan antarabangsa.

Seni silat yang dimaksudkan bukan saja meliputi koreografi untuk pementasan besar atau teater, bahkan persembahannya juga meliputi tarian dan majlis-majlis

tradisional.

Pusaka Karuhun, pimpinan mantan pesilat nasional (awal 1990-an), Iskandar Muda, yang mengembangkan jurusan Cimande kini mempunyai lebih 400 anggota daripada serata kelab di Singapura.

Dalam majlis pelancaran pungutan dana menerusi penjualan sate di Hougang pada Sabtu lalu, Iskandar berkata dana tersebut diperlukan untuk membeli peralatan dan kelengkapan bagi latihan seni silat daripada A hingga Z (seperti beg penumbuk, tilam pengalas jubin, uniform dan banyak lagi.

“Pusaka Karuhun memberi tumpuan kepada persembahan bercorak kesenian dan menerusi projek-projek yang telah diatur, kami berharap akan dapat merencanakan aspek kesenian pencak silat di Singapura,” kata Iskandar.

Penjualan sate goreng amal yang diedarkan pada 27 April dibuat menerusi kupon-kupon yang diedarkan oleh kesemua anak-anak pesilat, dengan kerjasama Hijrah.com.

Setiap kupon berharga \$10. Mereka yang ingin mendapatkan kupon tersebut boleh menghubungi 9270-5998 atau 6746-7207.